



**REPUBLIKA E SHQIPËRISË
KËSHILLI I MINISTRAVE**

projekt

VENDIM

Nr. _____, datë _____

PËR

INSPEKTORATIN SHTETËROR TË MBIKËQYRJES SË TREGUT

Në mbështetje të nenit 100 të Kushtetutës dhe të nenit 11, pikës 3 të nenit 51 dhe 56 të ligjit nr. 10433, datë 16.6.2011 "Për inspektimin në Republikën e Shqipërisë", të paragrafit 2 të nenit 9 të ligjit nr. 10480, datë 17.11.2011 "Për sigurinë e përgjithshme të produkteve joushqimore", të ndryshuar, të nenit 27 të ligjit nr. 10489, datë 15.12.2011 "Për tregtimin dhe mbikëqyrjen e tregut të produkteve joushqimore" të ndryshuar, të nenit 15/1 të ligjit nr. 8741, datë 15.2.2001 "Për sigurinë në punë në veprimtarinë minerare" të ndryshuar, të nenit 43 të ligjit nr. 10304, datë 15.7.2010 "Për sektorin minerar në Republikën e Shqipërisë" të ndryshuar, të nenit 131 të ligjit nr. 9380, datë 28.4.2005 "Për të drejtën e autorit dhe të drejtat e tjera të lidhura me të", të nenit 200 të ligjit nr. 9947, datë 07.07.2008 "Për pronësinë industriale", të ndryshuar, të pikës 1 të nenit 23 të ligjit nr. 8450, datë 24.02.1999 "Për përpunimin, transportimin dhe tregtimin e naftës, të gazit dhe nënprodukteve të tyre" të ndryshuar, të nenit 11 të ligjit nr. 8734, datë 1.2.2001 "Për garantimin e sigurisë së punës të pajisjeve dhe të instalimeve elektrike" të ndryshuar, të nenit 7/1 të ligjit nr. 9875, datë 14.2.2008 "Për metrologjinë" të ndryshuar, të nenit 51 të ligjit nr. 9902, datë 17.4.2008 "Për mbrojtjen e konsumatorëve" të ndryshuar, të nenit 10 të ligjit nr. 68/2012 "Për informacionin e konsumit të energjisë dhe burimeve të tjera të produkteve me ndikim në energji" dhe neneve të ligjit nr., datë "Për disa shtesa dhe ndryshime në legjislacionin në fuqi për inspektimin në Republikën e Shqipërisë", me propozimin e Ministrit të Ekonomisë, Tregtisë dhe Energjetikës, Këshilli i Ministrave,

VENDOSI:

I. KRIJIMI I INSPEKTORATIT SHTETËROR TË MBIKËQYRJES SË TREGUT

1. Krijohet Inspektorati Shtetëror i Mbikëqyrjes së Tregut (këtej e tutje në tekstin e këtij vendimi “ISHMT”), si institucion qendror, buxhetor, në varësi të Ministrit përgjegjës për tregtinë.

II. MISIONI DHE FUNKSIONET E ISHMT

2. ISHMT ka për mision garantimin e zbatimit të kërkesave ligjore lidhur me sigurinë e produkteve jo-ushqimore.
3. ISHMT është inspektorati përgjegjës për të gjitha funksionet e inspektimit në fushën ministrore të përgjegjësisë së ministrisë përgjegjëse për tregtinë dhe enegjetikën, për të gjithë produktet apo grup produktet jo-ushqimore, me përjashtim të atyre që nuk përfshihen në pikën 2 dhe 4 të këtij vendimi.
4. ISHMT, është, gjithashtu, përgjegjës për inspektimin e zbatimit të kërkesave ligjore për:
 - a) garantimin e sigurisë së punës të pajisjeve dhe të instalimeve elektrike, sipas legjislacionit për sigurinë e pajisjeve dhe instalimeve elektrike;
 - b) garantimin e sigurisë të pajisjeve nën presion, sipas legjislacionit për sigurinë e pajisjeve dhe instalimeve nën presion;
 - c) përpunimin, transportimin dhe tregtimin e naftës, të gazit dhe nënprodukteve të tyre, sipas legjislacionit për përpunimin, transportimin dhe tregtimin e naftës, të gazit dhe nënprodukteve të tyre;
 - ç) mbrojtjen e konsumatorëve, sipas legjislacionit për mbrojtjen e konsumatorëve;
 - d) pronësinë industriale, sipas legjislacionit për pronësinë industriale;
 - dh) të drejtat e autorit dhe të drejtat e tjera të lidhura me to;
 - e) veprimtarinë minerare;
 - ë) konsumin e energjisë dhe burimeve të tjera të produkteve me ndikim në energji;
 - f) metrologjinë.
5. Përveç sa parashikohet në paragrafët 3 dhe 4 të këtij vendimi ISHMT është përgjegjës për çdo funksion apo kompetencë tjetër të përcaktuar nga legjislacioni në fuqi për inspektoratin shtetëror që mbulon fushën e mbikëqyrjes së tregut.

III. ORGANIZIMI DHE FUNKSIONIMI I ISHMT

6. ISHMT organizohet në dy nivele: në atë qendror dhe rajonal ku këto të fundit janë për çdo qark të vendit.
7. ISHMT drejtohet nga Kryeinspektori. Kryeinspektori është titullari i institucionit.
Në kuadër të funksioneve dhe detyrave të Inspektoratit Shtetëror të Mbikëqyrjes së Tregut, Kryeinspektori i ISHMT-së ushtron kompetencat si më poshtë:
 - a) Përfaqëson ISHMT në marrëdhënie me të tretët dhe është përgjegjës për organizimin dhe koordinimin e funksionimit si dhe për cilësinë dhe efektivitetin e veprimtarisë së ISHMT-së.
 - b) Emëron dhe liron nga detyra personelin e ISHMT-së dhe të degëve rajonale, në varësi të tij, sipas procedurave të legjislacionit në fuqi.
 - c) Zbaton dhe administron buxhetin e miratuar të ISHMT-së, në përputhje me legjislacionin në fuqi dhe përgatit projektbuxhetin për vitin e ardhshëm, të cilin ia përcjell ministrit përgjegjës.
 - ç) Nxjerr urdhra dhe udhëzime për veprimtarinë e strukturave të ISHMT-së, në nivel qendror dhe rajonal, në fushën e inspektimit që ai mbulon.
 - d) Bashkërendon veprimtarinë e ISHMT-së me organet qendrore dhe organet e tjera shtetërore në fushën e inspektimit që ai mbulon.
 - dh) Siguron kontakte me organe homologe dhe organizata të ndryshme, të huaja, për zgjidhjen efektive të problemeve në fushën e inspektimit sipas paragrafëve 3 dhe 4 të këtij vendimi, si dhe veprimtari të tjera, për plotësimin e detyrave, të përcaktuara në legjislacionin në fuqi për inspektimin në fushat që ISHMT mbulon.
 - e) Siguron zbatimin dhe kontrollin e zbatimit të akteve ligjore e nënligjore, që rregullojnë veprimtarinë në fushën e inspektimit që ISHMT mbulon.
8. Kryeinspektori i ISHMT i raporton drejtpërdrejtë ministrit përgjegjës për tregtinë dhe energjetikën, përveçse kur ministri ka përcaktuar shprehimisht, me urdhër, një njësi tjetër raportimi në aparatit e ministrisë përgjegjëse.
9. ISHMT në nivel qendror ka këto funksione:
 - a) planifikon dhe bashkërendon veprimtarinë e inspektimit;
 - b) siguron unifikimin e praktikave të inspektimit, në shkallë vendi;
 - c) bashkërendon veprimtarinë e laboratorëve te veta dhe siguron kryerjen e analizave nga laboratorë të tjerë të akredituar, në rastin e pamundësisë së kryerjes së tyre nga laboratorët e veta;

- ç) informon publikun për veprimtarinë e inspektimit;
- d) jep mbështetje teknike, administrative dhe shkencore, për veprimtarinë e inspektimit;
- dh) përgatit programin dhe raportin vjetor të inspektimit.

10. Përveç sa parashikohet në paragrafin 9 të këtij vendimi, ISHMT në nivel qendror është përgjegjës për kryerjen e këtyre funksioneve të brendshme, për te gjithë institucionin duke përfshirë edhe degët në nivel rajonal:
- a) menaxhimin e burimeve njerëzore, çështjet ligjore, teknologjinë e informacionit, mirëmbajtjen dhe shërbimet e tjera mbështetëse;
 - b) përgatitjen dhe zbatimin e buxhetit, mbajtjen e kontabilitetit dhe kryerjen e auditimit të brendshëm.
11. Pranë ISHMT në nivel qendror, krijohet “Komisioni i ankimit të ISHMT”. Komisioni i ankimit, drejtohet nga Kryeinspektori dhe ka në përbërje:
- a) një përfaqësues të njësisë që mbulon çështjet juridike;
 - b) një përfaqësues që mbulon çështjet e metodologjisë së inspektimit;
 - c) dy specialistë të tjerë të ISHSH në nivel qendror.
12. Lista emërore e Komisionit të Ankimit miratohet me urdhër të Kryeinspektorit dhe bëhet publike me mjete të përshtatshme.
13. Degët rajonale të ISHMT ushtrojnë veprimtarinë e tyre në territorin e qarkut përkatës dhe janë përgjegjëse për inspektimin në qarkun përkatës. Me urdhër të Kryeinspektorit, inspektorët e një dege rajonale mund të ushtrojnë veprimtarinë e tyre edhe në territorin e një qarku tjetër, në bashkëpunim me degën rajonale përkatëse.
14. Në strukturën organizative të ISHMT në nivel qendror dhe në atë rajonal mbahen parasysh dhe ruhen profilet më të specializuara lidhur me inspektimin e metrologjisë si dhe të së drejtës së autorit dhe të drejtave të tjera të lidhura me të, patentave dhe markave.
15. Degët rajonale që kanë në territorin e tyre pika të kalimit të kufirit bashkëpunojnë me organet doganore dhe organet e tjera përkatëse për arritjen e qëllimeve të inspektimit.

16. Degët rajonale të ISHMT, drejtohen nga kryeinspektorët rajonalë. Kryeinspektori rajonal përfaqëson degën rajonale në marrëdhënie me të tretet në nivelin e qarkut përkatës dhe është përgjegjës për organizimin dhe koordinimin e funksionimit si dhe për cilësinë dhe efektivitetin e veprimtarisë së degës së tij.
17. Përveçsa parashikohet në paragrafin 16 të këtij vendimi, kryeinspektori rajonal:
- a) lëshon autorizimin e inspektimit, në përputhje dhe në bazë të programit të miratuar të inspektimit;
 - b) vendos për shtyrjen e kohëzgjatjes së autorizimit, në përputhje me legjislacionin në fuqi për inspektimin;
 - c) vendos për zëvendësimin e inspektorëve, gjatë inspektimit, sipas ligjit;
 - ç) shqyrton ankimin e veçantë ndaj vendimeve për masat urgjente të marra nga inspektorët e degës përkatëse.
18. Kryeinspektori rajonal i raporton dhe i jep llogari drejtpërdrejtë Kryeinspektorit të ISHMT-së, përveçse kur Kryeinspektori ka përcaktuar shprehimisht, me urdhër, një njësi tjetër raportimi pranë ISHMT-së në nivel qendror.

IV. STEMA DHE VULA ZYRTARE ISHMT

19. ISHMT identifikohet me stemën dhe vulën zyrtare.
20. Stema e ISHMT përbëhet nga Stema e Republikës dhe shënimet: “Republika e Shqipërisë, Ministria e Ekonomisë, Tregtisë dhe Energjetikës, Inspektorati Shtetëror i Mbikëqyrjes së Tregut”.
21. Vula e ISHMT ka formën dhe elementet e përcaktuara në piken 2 të Vendimit të Këshillit të Ministrave, nr. 390, datë 6.8.1993 “Për rregullat e prodhimit, administrimit, kontrollit dhe ruajtjes së vulave zyrtare” i ndryshuar”. Vula e ISHMT në nivel qendror përmban dhe shënimin identifikues “Inspektorati Shtetëror i Mbikëqyrjes së Tregut”, ndërsa vulat e degëve rajonale përmbajnë dhe shënimin identifikues: “Inspektorati Shtetëror i Mbikëqyrjes së Tregut, Dega Rajonale e Qarkut (emri përkatës i qarkut)”.

22. Vula e ISHMT dhe vulat e degëve rajonale, prodhohen, administrohen dhe ruhen në përputhje me legjislacionin në fuqi.

V. DISPOZITA TRANZITORE DHE TE FUNDIT

23. Ngarkohet Ministri i Ekonomisë, Tregtisë dhe Energjetikës që brenda 1 muaji nga hyrja në fuqi e këtij vendimi, të marrë masat për realizimin e emërimit të Kryeinspektorit të ISHMT dhe përgatitjen e strukturës dhe organikës së ISHMT-së, sipas akteve ligjore dhe nënligjore në fuqi.

24. Kryeinspektori i ISHMT, mbështetur nga njësitë përgjegjëse për shërbimet mbështetëse të Ministrisë së Ekonomisë, Tregtisë dhe Energjetikës dhe në përputhje me kërkesat specifike për arsimin e inspektorëve të miratuara nga Inspektorati Qendror, miraton kërkesat specifike për çdo vend pune në ISHMT.

25. Nëpunësit që kryejnë funksionet e inspektimit të përcaktuara në paragrafët 3 dhe 4 të këtij vendimi, që janë aktualisht të emëruar pranë Ministrisë së Ekonomisë, Tregtisë dhe Energjetikës, përfshirë institucionet e saj të varësisë apo drejtoritë rajonale të këtyre institucioneve dhe që plotësojnë kërkesat e përgjithshme për pranimin në shërbimin civil si dhe kërkesat specifike të përcaktuara sipas paragrafit 24 të këtij vendimi, transferohen në detyra të reja pranë ISHMT, brenda numrit dhe pozicioneve të organikes së miratuar sipas këtij vendimi.

26. Verifikimi i plotësisë të kërkesave të përgjithshme dhe atyre specifike sipas paragrafit 24, dhe propozimi i transferimit për çdo nëpunës, kryhet nga një komision *ad hoc* i krijuar posaçërisht për risistemimin e nëpunësve. Akti i transferimit, miratohet nga Kryeinspektori.

27. Komisioni *ad hoc* sipas paragrafit 26 të këtij vendimi, përbehet nga dy përfaqësues të Departamentit të Administratës Publike, dy përfaqësues të Ministrisë së Ekonomisë, Tregtisë dhe Energjetikës, një përfaqësues nga Inspektorati Qendror dhe mbështetet në punën e tij nga njësia përgjegjëse për shërbimet mbështetëse në këtë ministri.

28. Nëpunësit ekzistues të përcaktuar sipas paragrafit 25 të këtij vendimi, që nuk mund të transferohen në ISHMT, mbeten në institucionet përkatëse, të cilat riorganizohen brenda një periudhe 2 mujore nga hyrja në fuqi e këtij ligji.

29. Brenda tre muave nga hyrja në fuqi e ketij vendimi Ministri i Ekonomisë, Tregtisë dhe Energjetikës përcakton edhe rishpërndarjen e mjediseve e mjeteve të punes si dhe merr parasysh financimin me fonde buxhetore të ISHMT për vitin buxhetor 2013.

30. ISHMT fillon punën sipas strukturës dhe funksionimit të përcaktuar në këtë vendim dhe aktet nënligjore në zbatim të tij më datë 1.1.2013. Deri më datën 31.12.2012 funksionet inspektuese vazhdojnë të kryhen nga strukturat aktuale.

31. Çdo akt nënligjor në kundërshtim me këtë vendim, shfuqizohet.

Ky vendim hyn në fuqi në datë _____, pas botimit në “Fletoren Zyrtare”.